

Super quibus dominus Petrus Rot cum suis scripserunt  
Basiliensibus in hunc qui sequitur modum.

Den strengen, fursichtigen, ersamen, wisen burgermeister und  
rate z<sup>u</sup> Basel unsern lieben herren.

Strengen, fursichtigen, ersamen, wysen, lieben herren. unser  
willig dienst und was wir in allen sachen g<sup>u</sup>ts verm<sup>o</sup>gen z<sup>u</sup>vor.  
lieben, uff samstag ante Johannis Baptiste gar noch umb die  
zwey noch mittag hand wir in dem nammen des ewigen gottes, siner  
kunglichen jungfrowen und m<sup>u</sup>ter Marien, alles hymmelschen  
heres understanden die frommen l<sup>u</sup>t in Murten z<sup>u</sup> entschutten,  
als wir och geton hand und dem hertzogen sin leger abgewonnen  
und alles das, so dorinn gewesen ist, gantz n<sup>u</sup>tzit dovon kommen,  
darz<sup>u</sup> all sin buchsen und daby erslagen und ertrenckt by  
20000 mann, on grossen schaden; als wir uberslahend, do ist  
uff unser party nit 24 mann tod bliben. disz sachen wellend  
wir uch grund der worheit furderlich schriben. wie hart und  
gr<sup>e</sup>usenlich die sachen und der angriff z<sup>u</sup>gangen ist, wellend  
wir uch berichten am heymkommen. der ewig allemechtig gott,  
die wirdige und kusche, reine jungfrow und m<sup>u</sup>ter Maria, die  
heiligen 10000 ritter habend f<sup>u</sup>r uns gefochten, dann die sach  
nit monschlich gewesen ist. dem allemechtigen gott, siner  
wirdigen m<sup>u</sup>ter und den heiligen 10000 rittern wellend lob und  
danck sagen und sy loben und eren. Speckesser und Hans Kleinen  
knecht und ein rebman sind von uns tod bliben und sust ettlich  
wund, doch nit schedlich. wir hand uns z<sup>u</sup> ros<sup>z</sup> und z<sup>u</sup> f<sup>u</sup>ssz in  
mossen von den gnoden gotts gehalten, dasz wir hoffen, wir werdent  
sin lob und danck haben. datum

dominica ante Johannis Baptiste 76.

Peter Rot ritter h<sup>o</sup>btman,  
Thoman S<sup>u</sup>rlin )  
Jacob von Sennheym ) vennre.